

四庫全書

史部

欽定四庫全書

續資治通鑑長編卷三百六十六

宋 李燾 撰

哲宗

元祐元年二月癸酉監察御史王巖叟為左司諫 侍

御史劉摯言

摯遺藁此章以二月十二日上

臣昨者曾論天下監司多

無善狀乞朝廷考察澄汰別行選任後來未聞指揮方
今陛下興復仁政綏安生民而詔令所下奉行究宣實

在部使者有非其人澤不徧被臣伏見河北轉運副使李南公險薄刻害無士人之行天下所知往者以不嫁其妹委于他人先帝惡之黜置散地未幾夤緣再被任用本路昨起鹽禁南公虐行其法科配勞費一路被患近蒙聖恩遣使經畫已皆廢罷則害人之狀臣不復言南公職任監司親被寄委未嘗有一言論可否于朝廷意欲取勝京東有徼幸之望而不顧為國斂怨又去年三月陛下聖恩優賞軍士南公輒移檄州郡令于等第

人戶括借物上下驚擾人心不安及宣例繼下方行追改然戶民已有逃遁避去者南公之倚法罔上急于功賞遇事應變措置乖方此其大略也朔方劇部非他郡比朝廷北顧為重而南公者豈宜久使居之肆其殘虐實不足以副朝廷厚風俗安疲瘵之意伏請特行貶黜以允羣議不從南公尋徙河東路

南公自河北改河東在閏二月

福

建路轉運副使賈青添差監衡州在城鹽酒稅轉運副使王子京添差監永州在城鹽倉兼管酒稅務先是福

建路按察張汝賢言青魚提舉鹽事不究利害嚴督州縣廣認數目令鋪戶均買子京相承行遣又違法過為督迫訪聞轉運副使陳紘獨有寬厚之稱明知新增鹽額高大曾無舉發亦乞朝廷詳酌指揮故有是命

政目于八

年十月十八日已書朝散大夫賈青提舉太平觀今又書此合削彼所書

詔戶部郎中黃

廉按察川路茶法具利害以聞

魚體量滿江鹽并利害行狀有此合增入

先是劉摯言臣伏覩陛下即位聽政以來喜與天下休息于安治凡令之弗宜于民者疏通損益之官吏之弗

良于政者罷免放黜之中外欣戴人人如被大賚然事
猶有在遠方重地為害尤甚者則河北江湖之鹽法福
建川蜀之茶禁是也數路之害同而河北江湖福建已
蒙朝廷遣使廉治之獨蜀之茶害未聞詔旨臣竊嘗博
訪於知其事者槩得其說曰蜀地陋而陋茶之所出不
過數十州而已始時人賴以為生今茶司盡權而市之
大約園戶有茶一本而官市之額已至數十斤矣官所
給錢糜耗于公者名色不一如預借息錢驗引頭子錢

稅錢之類費用常以過半每歲春官司預以券給借錢糧必以牙僧保任之及輸入之日驗引交稱又牙僧主之故其費于牙僧者又不知幾何則是于園戶名為平市而實奪之也園戶有逃以免者有投死以免者已而其害猶及隣伍欲伐茶則有禁欲增植則加市故其俗論謂地非生茶也地實生禍也茶場司以茶為息始者息一出于茶也其後市之價愈下取之息愈多園戶不勝為之也故作茶日少裁足以應官額而已于是主茶

息者議不獨賴茶而又為博易以充之也博易之事他
貨百物貿販苛刻錐刀瑣屑無不為者依茶為名通曰
茶息商稅務坐視漏失歲課而不敢有所論也至于商
賈請算者平時便私散之州郡茶地今則一集于成都
一都場高其估以與之又總計平時所之州郡遠近道
里之費故都場之取息又如此商旅之所以難行也官
吏以息為功以功第賞既進官減年矣又以息額之餘
錢使與胥吏牙僧分取入已日用市易法也市易之賞

固非法也然其取息猶曰與民和市而茶之取息一用
嚴刑重禁網羅致之亦為功異矣奈何均用一法賞之
也今一任有分錢少者至數千緡而減年磨勘至有三
十餘年者此何理哉法亦可謂敝矣而朝廷遣使未之
及者豈非以蜀之茶法與熙河蘭會之經制相為用者
歟蜀茶之利以給熙河蘭會者天下十之三熙河蘭會
之費不止而蜀茶之害未可息也然熙河蘭會之費今
昔宜有不同昔者事邊之外前有王韶後有李憲提兵

革財用之大權朝廷捐金帛市租莫知紀極聽其自用
不領于有司無所會計非徒私二家也于是依倚苟合
之客圖功興事以利相市之徒公取公予莫見其跡則
熙河蘭會大費外又有以泄之者如此也今既制之于
有司無二人者之橫蠹若又于邊計外凡冗名濫費一
切大為之節約則蜀之茶雖未可以弛其禁而所謂十
之三者殆必可損矣伏望聖慈選遣使指考茶法之敝
欺者會計緣茶公家之所費與實息之數大減歲市之

額稍增斤直之價削納茶無名之錢以完養園戶裁官吏之負牙僧之數以省冗給罷息賞之濫分錢之敝以革欺倖而以其事與轉運司通治之如此則蜀民之困苦庶乎可以蘓也臣待罪言路既有得于人之言敢不亟以聞然此其大畧至于利害纖悉則願敕使者詳究焉

黃廡行狀可增入六月二十八日陸師閔罷時四月二十五日蘇轍云云五月四日差杜紘六月二十八

日陸師閔罷

開封府界提點司言准朝旨相度祥符縣霧

澤陂乞令人戶依舊斷佃攬水應副廣濟河行運從之

新錄
削去

詔河北路解發到保甲內尚榮孟隆李贊與三班差使更減二年磨勘孔震與三班借差並袍帶令歸吏部承受差遣以試驗武藝出等推恩也 兵部言府界提點提舉保甲司申准朝旨保甲更不教騎乞諸縣見催人戶買馬填官者並令依元價送納價錢本司封樁從之仍以元價十分為率若養及一年已上倒死者與免價錢二分每及一年遞減二分至五年者依條蠲免 右司諫蘇轍始供諫職上言臣伏見皇帝陛下以

至孝純仁承統踐阼太皇太后陛下以聰明睿智親庶政二聖協德以幸天下曾未暮歲而敝事稍去寬政復行元元之民免于流離之患蒙更生之福海內釋然無意外之憂不勝幸甚伏惟陛下恭勤祇畏發于天性猶復選于羣臣增廣諫員求直言以自助天下之士聞風相慶臣實何人得於今日備位于此然臣聞帝王之治必先正風俗風俗既正中人以下皆自勉以為善風俗一敗中人以上皆自棄而為惡中人自勉于善則人主

耳目衆多易於為治中人自棄于惡則臣下朋黨蕃殖
易以為非蓋邪正盛衰之源未有不始于此者也昔真
宗皇帝臨馭羣下獎用正人一時賢雋爭託明主孫奭
戚綸田錫王禹偁之徒既以諫諍顯名則忠良之士相
繼而起其後耄期厭事丁謂乘間將竊國命而風俗已
成朝多正士謂雖懷姦慝而無與同惡謀未及發旋即
流放仁宗皇帝仁厚淵默不自可否是非之論一付臺
諫孔道輔范仲淹歐陽修余靖之流以言事相高此風

既行士恥以鉗口失職當時執政大臣豈皆盡賢然畏忌人言不敢妄作一有不善言者即至隨輒屏去故雖人主寬厚而朝廷之間無大過失及先帝嗣位執政大臣變易祖宗法度下至小民皆知其非而卿士大夫從風而靡則風俗之變于此見矣是時惟有呂誨范鎮等明言其失二人既已得罪臺諫有以一言及之者皆紛然逐去由是風俗大敗無一人復正言者天佑皇室啟迪聖德臨政未幾而以言路為急天下聳然思見祖宗

遺俗然臣自至闕廷聞臺諫封事一切留中不出既不
施行又無黜責臣不勝憂疑夫朝廷所以待臺諫者不
過二事言當則行不當則黜其所上封事除事干機密
人主所當獨聞須至留中外並須降出行遣上所以正
朝廷之紀綱使無廢職業下所以全人臣之名節使無
負公議若當而不行不當而不黜則上下苟且廉恥道
廢風俗衰陋國將從之臣願陛下永惟邪正盛衰之漸
始于臺諫脩其官則聽其言言有不當隨事行遣大者

可黜小者可罷使風俗一定忠言日至陛下垂拱于上
羣臣肅雍于下則太平之治可立而待也惟陛下留神
省察天下幸甚

甲戌上御邇英閣侍讀韓維進讀至天禧中有二宮人
犯罪法當死真宗皇帝惻然憐之曰此等安知法殺之
則不忍捨之則無以勵衆乃使人持去笞而遣之又幸
汾陰日見一羊自擲于道左怪問之左右曰今日尚食
殺其羔真宗慘然不樂自是不殺羊羔因奏言此特小

善耳然推是心以及天下則仁不可勝用也且真宗自
澶淵却敵之後十有九年不言兵而天下富其源蓋出
于此昔孟子論齊王不忍殺鰥之牛以為是心足以王
今恩足以及禽獸而不及于百姓豈不能哉蓋不為耳
外人皆言陛下仁孝發于天性每行見昆蟲蝼蟻輒違
而過之且敕左右勿踐履此亦仁術也臣願陛下推此
心以及百姓則天下幸甚

三月二十四日程
願亦言避蟻事

詔府界

三路提舉保甲官并官屬罷謁禁

是日

甲戌
十五

御史中

承劉執言臣昨累具狀彈奏宰臣蔡確知樞密院章惇
乞行罷免至今未聞可否指揮臣竊以御史諫官之彈
劾大臣豈敢輕易哉言既出口疏既上聞則其勢不可
以中輟其義不可以兩立也幸而人主聽用其言而罷
大臣則諫官御史可以安其職而守其官矣若人主不
用其言不罷大臣則諫官御史失職不敢不求去矣此
言官之分職業之守也臣前後論確章疏並未蒙付外
則不審陛下終將聽臣之言乎蓋未可得而知也陛下

遂將棄臣之言不聽乎亦未可得而知也皆未可知故臣亦未敢輕為去就之計自求罷職又未敢備錄論確等前後文字繳連申三省以決是非而猶有所待也臣亦以謂幸遭皇帝陛下太皇太后陛下至仁至聖脩明政事興利除弊惠安四海開廣言路聽納如流乃臣子千載一時之遇臣所以自惜願于此時竭誠効智求有所立若欲以一疏輕決去住于為身之計則潔矣于事國之義則未也然而遲遲待命日已久矣若陛下但留

臣章疏不賜可否而臣又不自引去則公議以臣為如何而臣何顏以自安也臣與蔡確章惇非有仇嫌也非訐其陰邪小事也皆以其不忠于先朝不恭于陛下朋邪立黨包藏貳心反覆容身以固權位昧進退之義無廉恥之節皆公義所不容之罪也陛下何故不恤天下之義牽制而不斷哉臣屢勸陛下辨別邪正而進退之陛下若罷此二人則天下之邪正辨矣今天下之懷私為利者皆託此二人為之魁主天下之抱忠守義者皆

畏此二人不敢自効今陛下能濬發剛斷罷確與惇則
善人安小人化凡天下之奉承詔令更張政事者莫不
專志盡慮無復疑畏朝廷之福萬世之利在此一舉臣
所以區區冒犯威聽而不能已也伏望聖慈檢臣前後
言確等章疏再煩一賜詳覽以考二人罪狀然後降付
三省施行

摯遺藁係第十疏元年二月十五日上摯自去年十月以來累疏論確今年閏二月二日

確始罷相

左司諫蘇轍言伏見陛下以久旱憂勞禱請勤

至自冬歷春天意未答宿麥枯瘁災害廣遠民自近歲

皆苦于重歛儲積空匱若此月不雨飢饉必至盜賊必起保甲之餘民習武事猖狂嘯聚為患必甚而陛下所以應天勤民未有其實臣竊見去年赦書蠲免積欠止于殘零兩稅至于官本債負出限役錢皆不得除放民有破蕩家產父子流離衣食不繼有欲死而不可得者買撲酒坊先因實封投狀爭氣務勝競說高價既得之後利入微細不能出辦違限不納加以罰錢至于籍沒家產杻械生蠟虱而不得脫者臣願陛下降哀痛之書

應今日以前民間官本債負出限役錢及酒坊元額罰
錢見今資產耗竭實不能出者令州縣監司保明除放
使民得再生以養父母妻子朝廷棄捐必不可得之債
以收民心民心悅附甘澤可致雖使天道幽遠雨不時
應而仁澤流溢亦可以化服強暴消止盜賊臣謹按漢
書文景宣元之間憂民之疲病每歲輒弛租稅減算賦
自損以厚下民戴其澤中遭王莽之變皆謳吟思漢漢
以絕而復續夫漢世平安之日猶蠲必得之常賦以惠

民而况當今旱勢未止災害方作前件久負皆勢不可
得奈何靳而不與哉伏願陛下斷自聖心特降手詔無
使有司吝于出納以廢格聖澤則天人不遠宜有善應
又言臣竊見近年貪刻之吏習以成風上有毫髮之
意則下有邱山之取上有滂沛之澤則下有涓滴之施
如先帝向時為瀘南用兵兩川應副疲極特放五等人
戶賦稅而東川路轉運司公行格沮且只放三等以下
緣累經大赦不敢論列如此之類朝廷雖累行戒敕終

恐不改若行臣此奏即乞痛賜約束如監司敢有違戾

許州縣官吏具事由實封聞奏

實錄于閏二月四日略載此疏蓋是日方進呈

施行也今依蘇轍本集于上疏日即出之

乙亥宣州防禦使駙馬都尉張敦禮為密州觀察使以

冀國大長公主進封故恩及之 陝西轉運副使呂大

忠兼同制置解鹽使

恐有改法故著此不然削去

兵部言畿內馬

監已行廢罷即合於諸路相度置監乞差官前去經畫

詔庫部郎中郭茂恂往陝西河東路按行相度以聞

元豐

八年八月二十六日廢府界新置牧馬監并提舉經度制置牧馬司

殿前馬步軍司言

准朝旨相度到高翔上言乞依舊教閱御陣事欲於教陣日與新陣法相兼詔遇教陣隔日更互教習所有元

豐七年六月甲申指揮勿行

甲申六月十六日

先是神宗置

九軍營陣為方圓曲直銳凡五變為五陣遂罷教習御

陣至是復以舊陣互教中書省奏臣僚上言天下郡

縣累年逋負皆詔蠲放况日者已霈非常之澤凡七年

以前租之在民間者悉聽除放天下莫不悅喜至于免

役獨不與焉詔戶部勘會相度限半月聞奏

法冊元年二月十六

日聖旨

是日

乙亥十六日

司馬光言臣于今月十二日上言

乞以天子繼統曠然更始宜下詔數西人之罪而赦之縱未還其侵地且行此策以安邊境至今聞執政議尚未決臣之愚意以為封內未安未可圖外欲急行臣前策以羈縻西人且可數年邊鄙無事朝廷得休息戍兵安養百姓待國力完備家給人足然後奮揚天威討貳柔服何所不可若行臣前策可以萬全行臣後策有得

有失豈可棄上策而用下策捨萬全而就有失也太平
興國中李繼遷反西陲不解甲者十餘年關中困竭寶
元慶歷之間趙元昊叛屢入為寇覆軍殺將自是中國
虛耗不復富實今國家理財未得其道民力困窮于下
府庫窘乏于上又新遭大喪山陵纔畢自去年十月初
以來不雨雪旱勢甚大若萬一激怒西人微出一不遜
語則并臣前策亦不可行矣今因天子即位未久西人
外迹未有不順故臣願朝廷旦夕汲汲行之機會難得

時不可失此臣所惓惓進言不已也若萬一激怒西人
致生邊患兵連禍結士卒殄瘁於鋒鏑生民困竭於轉
餉餓殍蔽地盜賊蜂起為國家慮豈不危哉而執政方
以為西人微弱不敢動數遣使來誠心內附置之度外
不以為虞今復固執先禁私市之議又立法不嚴邊帥
不才者不先易去行之太早不能中節一旦禍生所忽
邊鄙震驚乃始歸罪夏人豈不害國事乎臣于今月三
日上所言措置西邊事雖畫二策固以還其侵地責而

赦之為上策嚴禁私市待其數年貧困來服然後赦之
為下策所為絕私市非立法至嚴帥臣智勇此法未易
可行不若前策道大體正萬全無失非臣前後反覆靜
言庸違也朝廷比來擢臣于冗散之中使預聞國論蓋
亦誤謂臣微有益于國家非徒采其虛名也臣不敢終
辭亦欲竭盡疲駑少酬大恩非苟貪於祿位也今盡忠
謀國而為衆所挫臣尚留此有何所用此國大事伏望
陛下早審察二議從其長者若聖意以臣言為然乞御

批依臣前策若降付三省樞密院執政仍有固守已見
爭之最力者乞如臣前奏令自入文字言先禁私市保
得他日必不致引惹邊事如其不然自執其咎 左司
諫蘇轍言伏見門下侍郎司馬光乞罷免役錢復行差
役法奉聖旨依奏施行臣竊謂近歲所行新法利害較
然其間免役所繫尤重朝廷自去秋以來改更略盡惟
此一事遲留不決民間傾聽想聞德音臣竊料此事既
行民間鼓舞相慶如飢得食如旱得雨比之去年罷導

洛市易鹽鐵等事其喜十倍非至仁至聖至明至斷誰能行此然臣有愚慮蓋朝廷自行免役至今近二十年官私久已習慣今初行差役不免少有齟齬不齊譬如人有重病不治必死醫者用藥攻療必有瞑眩不寧要須藥去病消然後乃得安樂今中外用事臣僚多因新法進用既見朝廷革去宿敝心不自安必因差役之始民間小有不便指以為言眩惑聖聰敗亂仁政兼臣竊觀司馬光前件劄子條陳差役事件大綱已得允當然

其間不免疎略及小有差誤執政大臣豈有不知若公
心共濟即合據光所請推行大意修完小節然後行下
今但備錄劄子前坐光姓名後坐聖旨依奏其意可知
自今以往其必有人借中外異同之論以搖動大議臣
願陛下但思祖宗以來差役法行民間有何患害近歲
既行免役民間之敝耳目厭聞即差役可行免役可罷
不待思慮而決矣伏乞將臣此奏留中不出時賜省覽
苟大法既正縱有小害隨事更張年歲之間法度自備

臣疎遠小臣初蒙擢用輒此深言罪在不赦但念臣無左右之助諫垣之命出自聖意不敢自同他人更存形迹冒昧陳聞陛下裁幸 又言臣竊詳差役利害條目

不一全在有司節次修定近則半年遠亦不過一年必有成法至于鄉戶不可不差役錢不可不罷此兩事可以一言而決緣所在役錢寬剩一二年間必未至闕用從今放免理在不疑前來司馬光文字雖有役錢一切並罷之文又却委自州縣監司看詳有無妨礙臣竊慮

諸路為見有此指揮未敢便行放罷依舊催理則凶歲
疲民無所從出或致生事欲乞特降手詔大略云先帝
役法本是一時權宜指揮施行歲久民間難得見錢已
詔有司依舊差役所有役錢除坊郭單丁女戶寺觀依
舊外其餘限詔到日並與出榜放免其去年已前見欠
役錢具數聞奏未得催理聽候指揮 右正言王覲言
免役之法便于民者固多而亦不能無弊如此則其勢
必至于更張而更張不可以不慎也望與執政大臣熟

講之審取之而無忽則天下幸甚 監察御史孫升言

臣聞有治人無治法法待人而後行此古今不易之理也伏以陛下即政以來因天下之所欲惡而廢舉之海內傾心日望膏澤比因耆舊正論復行祖宗百年差役舊法慰安元元蘇息疲瘵中外歡欣幽明慶快然臣竊以謂免役之為法推行十有餘年習俗已成一旦盡復舊法其間不無窒礙理當委曲隨宜斟酌惟以便安公私為務竊恐諸路使者以其議獨出于一人而罔上賊

民偷合苟容之徒遺毒餘孽猶有存者未能竭誠盡公
推廣陛下仁心恢復祖宗成法伏望聖慈早降指揮選
擇諸路轉運使誠飭諸部使者咸令體認朝廷因民所
欲復行祖宗之法惠養元元之意務在協心盡公委曲
斟酌便安公私無或過差以相違戾庶祖宗成法早獲
就緒則天下幸甚貼黃稱勅文獨坐司馬光之言朝廷
委曲處分茲事體大竊恐人事有失欲致煩言此不可
不察也惟早選擇諸路轉運使使之推行此最為急伏

望陛下留意幸甚又新法役人數目比舊裁減大半舊
法圓融陪備新法一切禁止官自出給推行之際不無
窒礙須在得人委曲條析上聞方可詳盡又王安石更
改役法斥逐正人端士力致輕浮後生專令提舉布在
諸路則知法無良不良必待人而後行今民力困極非
十五年前之比須在委曲隨宜斟酌施行務在合宜則
人無異論選擇諸路使者不可後也

舊錄云司馬光言
復行差役之初提

舉官必競言役錢不可罷萬一聽之則良法復壞伏望
朝廷執之堅如金石雖有小小利害俟諸路轉運使奏

到徐為改更亦未為晚願朝廷勿以人言輕壞利民良
法光廢免役法至是知四方民苦之議者紛然故為此
說自救焉又云王覲孫升皆光黨也知差役之害民不
敢盡以光為非建言以彌縫之新錄辨曰法令之出患
在輕改差役既已施行又許郡縣監司具利害上聞則
俟奏到而後更改為宜不得謂之自救覲等身在臺諫
建言損益乃其職非彌縫也自復行以下並刪去司馬
光劄子別出全文于後按司馬光劄子新錄與覲升所
言并載于二十二日今依章惇駁議移光劄子見十七
日下覲升所言附蘇轍後舊錄欲以覲升所言證光之
失故止存數語新錄固當追尋覲升全章具載今但刪
去誣謗餘並仍舊文似太踈畧也王覲孫升所言大抵
與蘇轍不異當求全本具錄之孫升已得全本獨王覲
未得二十八日章惇駁奏後覲言可考徽宗寔錄王覲
傳云覲論役法曰司馬光所言差役雖大意已善而所
立條目小有未盡章惇既為同列當共議之時不能盡

忠論辨乃待其已行之後方言其不便其懷姦狙詐如此觀劾惲在閏二月二十三日惲罷樞密前恐傳所載乃劾惲奏非此時專為役設

尚書右丞李清臣奏伏以夏國雖通

問使未就貢職察其深意實為歿兵之策觀我強弱謂朝廷有厭兵之論則自棄新疆坐收全勝若依舊固守則今秋物力稍完必左右攻劫使應接倉皇縱未能襲破城寨使上下恐動自謀退保臣料戎人之計必出于此昨日蒙宣問執政奏議未決竊惟邊境大事輔臣之責而上貽聖憂在於愚臣深負愧惕竊見呂大防范純

仁皆久在西塞今並依京闕其人明審詳練衆論所稱
欲望特降聖旨問以手札使條具邊計及新立城寨可
守可棄果決之策若夏國未肯款服當如何措置向去
如何守禦以其奏付三省樞密院與司馬光所言參決
利害或選遣一人行視邊塞親與逐路將帥定議聞奏
庶得不致誤事又乞先密降御批各付呂大防范純仁
俟有所奏即賜聖覽詳酌取捨施行其選遣一人行視
就議一節別乞指揮貴得邊計審重

丙子太皇太后遣中使以實封手詔賜呂大防及范純仁曰勘會夏國自神宗皇帝升遐後來遣使弔慰祭奠繼以告國母喪進遺物今者又復遣使入朝謝恩使人比來外示恭順稍可見矣然戎情狡獪未測其誠心何如耳如向者所得邊地雖建立城寨亦慮孤僻不易應援棄之則弱國威守之則終恐戎人在念卿久住西塞深曉邊情當此宜罄嘉謀輔予憂勞可條具邊計合如何措置向去如何守禦親書實封聞奏無拘以文者

呂大防對曰詔問戎情狡獪未測其誠心何如臣愚以
為敵人之情自古無信西夏自繼遷以來專事譎詐惟
朝廷御得其道則詐無所施或失其方則驕而益肆待
遇之禮不可不謹然以臣觀之今日夏戎情略可見矣
羌人重于酬賽先帝舉大兵徑抵靈武幾入其國而不
能以數萬之衆入塞為報永樂諸將寡謀敗事使彼中
僅得以藉口然自是王師深入不虞之咎非其本國舉
兵之成功蓋未足以為美此彼之無能為一也自來開

邊進築之始彼必極力決爭乘其未完至于三四不能得而後已昨蘭州之城攘斥甚廣雖一再至爭不能得去歲永合遂不復來城既一完彼望亦絕此彼之無能二也比聞秉常極孱劣梁氏既死而秉常存亡未可知若秉常已亡則內難未已何暇外圖雖使秉常得存亦不足畏今數遣使入朝而不早布誠款者蓋苟欲觀望遷延不敢先發以示弱以臣愚計竊聞夏使旦夕到闕可使押伴臣僚且以私意問其來使今主上嗣登寶位

自大遼諸國皆遣使入賀夏國是朝廷藩臣何故獨不
至以觀其意足以測其情偽矣又詔問向者所得邊地
雖建立城寨亦慮孤僻不易應援棄之則弱國威守之
則終恐戎人在念臣所課新收疆土議者多言可棄蓋
思之未熟也詔旨以為弱國威而已又有取侮于四方
之端焉不可不審計也況蘭州西使之地本非夏國封
境又其君長嘗受朝廷祿秩元昊以來方盜據其地延
慶城寨則接近漢界一旦既得而棄之未見其可今日

措置之宜只可降詔下本路將會州一處更不攻取改
熙河蘭會路為熙河蘭州路其蘭州及延慶兩路新建
城寨只據見得地界守禦亦可以稍安敵情而為議和
之計矣議者不過謂戍兵少則不足以出戰多則無力
以供饋臣愚以為綏蘭之地皆並塞美田增招民兵墾
闢以足食則供饋之費省專事守計少存戰兵則騎兵
可大減矣其增招民兵墾闢曠土分守戰之計減供饋
之費如以為可即乞下臣條析子細利害又詔問邊計

合如何措置向去如何守禦臣愚以為今日邊計惟擇將帥為先轉運使為次其他施設皆可取辦伏聞國初西戎之患多在環慶太祖皇帝擇姚內斌董遵誨二驍將以守一州租賦之入兵械之費一切付之而聽其自為西人畏之不敢入寇今以四海九州之力奉遑而不足太祖以二州租入之費禦戎而有餘以此言之守禦之方在于得人而已臣愚以為陝西五路宜擇威名忠亮之臣不限文武為之統帥其次以為將佐又擇公正

強明之臣以為轉運使副俾各擇其材能以充其任使之屬官被遣之城專事守計而出戰救援之兵蓄于內郡平居則散而耕寇至則聚而守且為內郡之兵以援之視寇入之多寡深淺而必報之無使其得志亦不妄動以生事守兵雖見大利不得出戰戰兵雖見大利不得久在邊如此則費省而易供守堅而不墮其計又言臣嚮在永興軍日得米脂降羌具道秉常所為使其言粗可信必不能用其眾又臣近館伴北使曾語及夏國

遣使入貢北使却問作何人遣使以此觀之秉常存亡
誠未可知又言元昊既得甘涼遂有窺隴蜀之志後緣
嘉勒斯中強無以進取今青唐乖亂其勢漸分若中國又
失洮蘭之土則他日隴蜀之患不可不預為之防又言
臣愚以為今日邊帥全藉威名曾經戰陣之將以服敵
氣竊謂宜參用武帥如劉昌祚張守約种師古輩皆可為
用但儒臣常議或謂武將皆不可用此不知邊事之過
計也又臣伏見詔旨陛下深慮邊計極為焦勞以臣料

之今日西夏無繼遷元昊之強中國有練卒精甲之備
苟將帥得人固無足畏 范純仁對曰臣竊見夏國自
朝廷用兵以來近漢之民頗失生業並塞二百餘里不
敢耕種其國上下之人皆欲講和又自陛下臨御之初
聖政鼎新凡有不利于民者悉為蠲除每詔令一下民
間謹呼鼓舞以至印賣傳播謂之快活條貫此事即時
聞於夏人又邊上臣僚亦多體朝廷意不縱侵擾以此
夏國必謂朝廷待之異于前時所以遣使入慰探朝廷

之意朝廷待其初來之使禮意既厚是以接續肯來以至累次不失恭順而終未敢復言請地者其意應為前來朝廷拒之太峻却慮啟口之後更失朝廷之意則和好愈難今夏人又將到闕願選擇押伴臣僚使與推誠語論因而談美聖政及陛下好生惡殺捨己從人之德彼必有所對答則西夏之情亦可測見願和之意則可令押伴臣僚自作臆度說與自用兵以來其有陷蕃官吏軍民見在西界若夏國盡底納與朝廷聞朝廷待將俘到生

口賜還夏國如有邊上未便之事亦可因而陳請朝廷
必應量度應副彼若云前來已曾請地入貢蒙朝廷不允
則可答云前來請地入貢是梁氏之意宜其朝廷不允今
梁氏已死朝廷于國主必無所難彼若無對答則乞委
延州趙高宣布此意其肯還生靈及來請地則可曠然
降詔許之亦不須疑其狡獪難測彼將陷蕃官吏軍民
押在界上即却將向來所得邊地及城寨内外有居漢
人屬戶先次漸令移入近裏并勾集前後俘到夏國生

口亦在界上先立定誓表預約日數兩相交還如此措置則取捨有名于國威無損其有向來所得邊地雖是建立城寨其間實有孤僻不易應援供餉之處留之則戎人必須在念邊事難息若却換得陷蕃生靈不惟無損國體兼和氣充塞天地陛下聖德超越古今矣若趙高諭意不肯換易之後尚較計別有邀索此則我直彼曲我逸彼勞我直彼曲則神人共怒滅亡可待我逸彼勞則雖久不來庭于王道無損所有交際及宣布之時

其間合有意度節次更委趙高條上不得落賊姦計臣
倉卒略具大槩答聖問未能詳盡如蒙召對尚有口奏
事件更在陛下擇而行之天下幸甚臣所知邊事只熟
知環慶及粗知廊延其他路非臣所知臣今所陳乃王
體當然為萬世之法非一時之利害也又其宣布意度及換
易事節先須只作押伴臣僚及帥臣臆度者竊恐戎人
萬一應對之間失禮不遜則于朝廷無損又將來夏人
回人必有答詔便可獎諭其累次遣使恭順及喻以解

仇釋怨罷兵息民之意 先是純仁自慶州召入奏曰
臣昨日見罷便蒙三省樞密院召赴都堂訪問邊事臣
乍從外任遠來不暇深思熟慮即隨所問略據臆陳
對問欲降詔則以解仇釋怨罷兵息民為對問欲審察
敵情措置事機則以專委帥臣為對問棄地可否則以
不可徒然便與可換易陷蕃軍民生口為對緣臣不見
先朝舉兵征討因依及夏人後來乞和請地并答詔阻
絕本末加以臣志慮短淺訖無果決定論以副所問以

臣思之此是國家大事安危所繫兼二三執政所見未
同伏計陛下深居九重不易裁決臣今輒有愚見須當
密具啟陳難以形于文字伏望聖慈只作中旨特詔臣
上殿賜以閑燕俾得敷陳一二庶幾少裨聖明奏既入
乃與呂大防同有是問 是日

丙子十七日

司馬光言臣近

以抱病家居恐溘先朝露無以少報盛德是以力疾貪
陳所見竊以即日為小民病者無若免役錢欲乞悉行
廢罷復祖宗差役舊法識慮短淺不意朝廷盡從其說

非陛下明斷不能如是此乃天下之幸非獨微臣之幸也然臣聞令出惟行弗惟反彼免役錢雖于下户困苦上户優便行之已近二十年人情習熟一旦變更不能不懷異同又復行差役之初州縣不能不小有煩擾又提舉官專以多歛役錢為功惟恐役錢之罷若見朝廷於今日所下勅微有變動必更相告曰朝廷之勅果尚未定宜且觀望必競言役錢不可罷朝廷萬一聽之則良法復壞矣伏望朝廷執之堅如金石雖小小利害未

備俟諸路轉運司奏到徐為改更亦未晚當此之際則

願朝廷勿以人言輕壞利民良法

光集無月日實錄于二月二十二日載此

章惇駁議稱十七日今從之呂大防政目亦云十七日光再劄論役法

丁丑故西蕃邈川首領河西節度使威武郡王董戩男

肅州防禦使鄂特凌古起復為河西節度使西蕃邈川首

領寧塞郡公三省樞密院言董戩死欲依例支賜即不

得令賜鄂特凌古制誥使臣一就齎押去從之

鄂特凌古事具在正月

十二日

辛未 中書省言六陵准敕城用荆芭分委奉先兵

士採織兵士夜宿陵寢恐因此闕事乞下永安縣計置
召人結買詔守陵寢兵士豈可于外役使所有城用荆
芭亦不須和買自今並令停罷

御集二月十八日

庚辰詔諸將兵在鎮寨將官駐劄者監鎮主依知縣法
同管勾公事著為法 夏國主秉常遣使入貢詔學士
院降詔答之先是秉常母死朝廷遣使賻贈至是入貢
故也

辛巳江西湖南路按察司按察得蹇周輔先蒙朝廷差

委相度江南西路鹽法不能上體德意而乃率性掊剋
頓增鹽數立法敷奏更為欺誕既而其子序辰專領鹽
事以議出其父略無向公之心惟多方營救以掩其過
更令州縣增賣額外之數先期支鹽後期納錢州縣承
行之後愈見煩勞朱彥博繼領鹽事既見上項違戾即
未嘗盡行究正洎聞朝廷遣官按察之後乃以推行詔
書為說檢坐違法事件令官司依應施行知吉州魏綸
擘畫逐年增剝鹽九十餘萬斤已措置均敷添召有物

力鋪戶承買添增到鹽數到年終比較蹇周輔元定鹽額上虧止是虛數委有欺罔并右正言王覲奏竊見江西福建鹽法皆蹇周輔等相度立法之時惟務得利之多自為進身久未譴逐今又聞奉議郎程之邵除提舉梓州路常平等事之邵乃周輔相度鹽法之時奏辟隨行勾當公事之人朝廷用周輔之薦謂立法有功遂拔自常調除轉運判官當與周輔同行黜削乃復付以一路事權豈協公議周輔等增添課額害民罔上自當速

正典刑今周輔職任仍舊而之邵復蒙任中外人心安得不惑望早行貶責詔刑部侍郎蹇周輔落職知和州權江南西路轉運判官朱彥博權知興國軍承議郎司

封員外郎蹇序辰簽判廬州奉議郎程之邵罷提舉梓

州路常平等事

之邵除梓倉乃二月六日元豐六年四月丁丑初遣陳次升察江西五月戊申

又察湖南劉摯先以去年十一月十八日又十二月三日又二十二日凡三章論周輔序辰及今乃責摯言今

附本月日

詔新除御史中丞劉摯舉監察御史二員

摯除中丞

乃二月十二日也二十二日詔猶稱新除緣摯辭免自十七日居家待命猶未供職故也

宰臣蔡

確言奉差提舉修神宗皇帝實錄欲乞就門下後省東
位權充修實錄院從之 禮部言管勾同文館所狀高

麗國王送到書上親王兩府等本部未敢依例用土物
回報詔依例 河東路經略安撫使司言火山軍今月

九日北界西京留守等大小官十有餘人引馬來界壕
上相度壘起石城處地界及朔州人馬見在東偏頭村
存泊本司已牒緣邊安撫司依先降朝旨候北人退散
審度間便前去毀拆詔河東路經略司依累指揮如合

添差官員兵馬亦仰相度選那差撥

閏二月甲午可考

樞密

院言董戩死近繳到鄂特凌古蕃字差人進奉今詳蕃字

皆鄂特凌古自言之辭即不見青唐自鄂特凌古管事後蕃

情有無不順事跡其在董戩左右親信之人及内外主

兵酋首委的服與不服鄂特凌古指揮欲令趙濟選差曾

往青唐使臣押入蕃支賜密諭使臣令自入界體訪情

實以聞從之

青唐錄乃以此事係之朝廷爵命鄂特凌古前蓋誤也此月二十八日有詔候趙濟奏

到方給鄂特凌古官誥今青唐錄亦有熙河帥司奏蕃部服從鄂特凌古事蓋濟以三月十六日奏到也

左

正言朱光庭奏

此據編類章疏增入二月十二日

臣竊聞惟輔弼之任

實難其人道足以經邦德足以表世才足以制作禮樂
政足以推行仁義恥君不如堯舜愛民若保赤子鮮有
稱斯任者也如蔡確章惇韓縝者其心徇私安有經邦
之道其迹回邪安有表世之德其蘊蓄空踈安有推行
仁義之政觀望逢迎安有恥君不如堯舜之志因循苟
且安有愛民若保赤子之誠使之居鼎軸代天工所謂
負且乘者矣方聖政日新天下太平之際而為輔臣者

若此將安用哉而不恭不忠不恥之迹見於行事已極
著明臣已累具奏論至今未蒙施行禮曰事君難進而
易退則位有序易進而難退則亂也故君子三揖而進
一辭而退以遠亂也今日姦邪之人非不知言者累有
章疏而偃蹇自處殊無忌憚不知進退陛下天地之量
曲示包涵然而代天理物之任使此姦邪冒處以害政
事終累聖德伏望陛下檢會臣前後累奏早賜睿旨施
行貼黃陛下臨御以來聖政如此天下日就太平惟早

去姦邪明進忠亮以幸天下

監察御史王巖叟奏

編類

章疏二月二十二日

臣累奏論列蔡確章惇姦邪讒險不可久持

大柄親近陛下恐日月浸淫惑亂聖聽辨之愈難去益
不易臣每讀史書見自古以來姦邪在上人君往往不
知忠臣義士雖憤激指言人君又多不信所以養成禍
亂悔不可追唐德宗朝宰相盧杞姦邪蔽塞人情致亂
天下德宗猶不覺悟仍問李泌曰人皆言盧杞姦邪朕
何以不知泌對曰惟陛下不知所以為姦邪今天下之

人皆言蔡確章惇天性姦邪無由變改恐于陛下不覺不疑之間潜行私意陰作身謀或欺罔聖聰或詭隨睿旨或沮格公言或傾陷善類千機萬巧陛下如何可防諫官御史如何盡知雖或知之幾人敢言此姦邪之所以不懼也確輩若從來果是忠臣則天下之人莫不願其長在廟堂自受太平之福安肯日夜望天子遂而去之陛下以此可以亮天下之情矣伏望陛下深味李泌之言遠鑒德宗之蔽勿容盧杞之徒久居柄任則社稷

幸甚天下幸甚乞早賜指揮臣前論奏二姦臣章疏付外施行 中散大夫天章閣待制提舉玉局觀致仕李
大臨卒

癸未通直郎李琬特換授供備庫副使徙知大名府韓絳請也 樞密院言河東額外招到土兵並係應副本路差使兼減下戍兵不少其所支費錢糧等欲令轉運司管認應副所有本路封樁闕額禁軍請受並免從之
右司諫蘇轍言臣伏見朝廷近罷市易事不與商賈

爭利四民各得其業欣戴聖德無有窮已惟有益利鳳
熙河等路茶場司以買賣茶虐四路生靈又茶法影蔽
市易販賣百物州縣監司不敢顧問為害不細而朝廷
未如禁止臣聞五代之際孟氏竊據蜀土國用徧狹始
有榷茶之法及藝祖平蜀之後放罷一切橫斂茶遂無
禁民間便之其後淳化間牟利之臣始議掊取大盜王
小波李順等因販茶失職窮為剽劫凶鯁一扇而蜀之
民肝腦塗地久而後定自後朝廷始因民間販賣量行

收稅所取雖不甚多而商賈流行為利自廣近歲李杞
初立茶法一切禁止民間私買然猶所收之息止以四
十萬貫為額供億熙河至劉佐蒲宗閔提舉茶事取息
太重立法太嚴遠人始病是時知彭州呂陶奏乞改法
只行長引令民自販茶每茶一貫長引錢一百更不得
取息得旨依奏民間聞之方有息肩之望又却差孫迥
李稷入川相度始擬極力掊取因建言乞許茶價隨時
增減茶法既有增減之文則取息依舊由是息錢長引

二說並行而民間轉不易矣而糴等又益以販鹽布乃能增額及六十萬貫及李稷引陸師閔共事又增額至一百萬貫師閔近歲又乞于額外以一百萬貫為獻朝廷許之于是奏乞於成都府置場客旅無見錢買茶許以金銀諸貨折博遂以折博為名多遣公人牙人公行拘攔民間物貨入場賤買貴賣其害過于市易又以本錢質典諸物公違條法欺罔朝廷蓋茶法始行至今法度凡四變矣每變取利益深民益困弊然供億熙河止

於四十萬貫其餘以供給官吏及非理進獻希求恩賞而害民之餘辱國傷教又有甚者夫逐州通判本以按察吏民諸縣令佐亦以撫字百姓而計筭息錢均與牙僧分利至于監茶之官發茶萬馱即轉一官知縣減三年磨勘國之名器輕以與人遂使貪冒滋彰廉耻不立深可痛惜又案盜賊之法賊及二貫止徒一年出賞五貫今民有以錢八百私買茶四十斤者輒徒一年出賞三十貫又遞鋪文字事干軍機及非常盜賊脚遞日行

四百里馬遞日行三百里違二日者止徒一年今茶遞
往還日行四百里違一日輒徒一年立法太深苟以自
便不顧輕重之宜蓋造立茶法皆傾險小人不識事體
但以遠民無由申訴而他司畏憚不敢辦理是以公行
不道自始至今十餘年矣臣竊聞朝廷近日察知其弊
差官體量然猶恐未知其詳臣今訪聞稍得其實謹具
條件五害如左其一曰益利路所在有茶其間卽蜀彭
漢綿雅洋等州興元府三泉縣人戶種茶為生自官權

茶以來以重法脅制不許私賣抑勒等第高秤低估遞

年減價見今止得舊價之半

乞委所差官取榷茶至今遞年所估價例對定即見

的實茶官又於每歲秋成糶米高估米價強俵茶戶謂之

茶本假令米直八百錢即依一貫支俵仍勒出息二分

春茶既發茶戶納茶又例抑半價魚壓以大秤所損有

半謂之青苗茶

元條園戶茶一百斤許收十斤市例內用一半入官一半用饒潤客旅今逐場

一百斤收至二十餘斤出利者往往却偽作園戶中茶虛旁支出官錢入已近者邛州嘗有此獄又有數多陰

與客旅商量納賂及至賣茶本法止許收息二分今多

作名目如牙錢打角錢之類至收五分以上買茶商旅勢必不肯多出價錢皆是減價錢損園戶以求易售又昔日官未榷茶園戶例收晚茶謂之秋老黃茶不限早晚隨時出賣榷茶之後官賣止于六月晚茶入官依條毀棄官既不收園戶須至私賣以陷重禁此園戶之害一也其二曰川茶本法止于官自販茶其法已陋今官吏緣法為姦遂又販布販大寧鹽販瓷器等并因販茶還脚販解鹽入蜀所販解鹽仍分配州縣多方變賣及

折博雜物貨為害不一及近歲立都茶場緣折博之法
拘欄百貨出賣收息其間紗羅皆販入陝西奪商賈工
利至于買賣之餘則又加以質當去年八九月間為成
都買撲酒坊人李安典糯米一萬貫每斛出息八錢半
年未贖更出息二分其他非法類皆如此今四方蒙賴
聖恩罷去市易抵當之弊而蜀中茶官獨因緣茶法潛
行二事使西南之民獨不蒙惠澤此平民之害二也其
三曰昔官未權茶陝西商旅皆以解鹽及藥物等入蜀

販茶所過州軍已出一重稅錢及販茶出蜀兼帶蜀貨沿路又復納稅以此省稅增羨今官自販茶所至雖量出稅錢比舊十不及一縱有商旅興販諸處稅務畏憚茶官又利于分取息錢例多欺詐以稅為息由此省稅益耗假有作稅錢上歷歲終又不撥還轉運司但添作茶官歲課公行欺罔

訪聞元豐七年八月陸師閔劄子奏茶司今年課利內有一項係茶

稅錢

又茶官違法販賣百物商旅不行非惟稅虧兼害酒

課蜀中舊使交子惟有茶山交易最為浩瀚今官自買

茶交子因此價賤

舊日蜀人利交子之輕便一貫有賣一貫一百者近歲止賣九百以上

此省課之害三也其四曰蜀道行于溪山之間最號嶮惡般茶至陝西人力最苦元豐之初始于成都府路廂軍數百人貼鋪般運不一二年死亡略盡茶官遂令州縣和雇人夫和雇不行即差稅戶其為騷擾不可勝言

劉庠知永興日有洋州般茶人有疲勞不堪告訴庠令取狀在案判云候本府雇人般茶日呈後來永興即不

曾雇人

後遂添置遞鋪十五里輒立一鋪招兵五千人起

屋六十間官破錢一百五十六貫益以民力僅乃得成

今置百餘鋪矣若二百餘鋪皆成則是添兵萬人衣糧
歲費二十萬貫見招填不足旋貼諸州廂庫逐州闕人
百事不集又茶遞一人日般四駄計四百斤餘回車却載
解鹽往還山行六十里稍遇泥濘人力不支逃匿求死
嗟怨滿道至去年八九月間劔州劍陽一鋪人全然走
盡沿路號茶鋪為納命場此遞鋪之害四也其五曰陝
西民間所用食茶蓋有定數茶官貪求羨息般運過多
出賣不盡逐州多虧歲額遂于每斤增價俵賣與人元

豐八年鳳州準茶官指揮每茶一斤添一百錢其餘州郡準此可見又茶法初行賣茶地分于鳳秦熙河今遂東至陝府侵奪蠟茶地分所損必多此陝西之害五也五害不除蜀人泣血無所控告臣乞朝廷哀憐遠民罷放榷法令細民自作交易但收稅錢不出長引止令所在場務據數抽買博馬茶勿失朝廷武備而已如此則救民于網羅之中使得再生以養父母妻子不勝幸甚如朝廷以為陝西邊事未寧不欲頓罷茶事即乞先弛

權禁因民販茶正稅之外仍收長引錢一歲之入不下

數十萬貫

以見今長引錢數計之可見

而商旅通行東西諸貨日夜

流轉所得茶稅雜稅錢及酒課增羨又可得數十萬貫

以未榷茶

以前及榷茶後來年分自蜀至陝西沿路酒稅務歲課較之可見

而罷置茶遞無養兵

衣糧及官吏緣茶所費息錢食錢之類其數亦自不少

則榷茶可罷灼然易見若異日西邊無事然後更罷長

引錢如舊稅而止然臣再詳師閔所營茶利雖使之裒

斂一一如數止于二百萬貫無復贏餘矣若以前件茶

引茶稅雜稅酒課等錢約七八百萬貫折除即止約有利一百二十餘萬貫若更除茶遞養兵衣糧及官吏緣茶所費約三四十萬貫即是師閔百端非理凌虐細民止得八十萬貫

前件兩項錢並且從小約計故師閔所得利有八十萬貫若依實計之恐不得

及此數矣

假令萬一蜀中稍有飢饉之災民不堪命起為盜

賊或如淳化之比臣不知朝廷用兵幾何費錢幾何殺人幾何可得平定今但得七八十萬貫錢置此不慮臣竊惑也兼臣訪聞陸師閔去年自成都府移治永興仍

取成都供給有本府衙前楊日新者為之賣酒至十一月中師閔自覺非法始移牒永興成都止就用永興供給其違法差衙前賣酒及多請過成都供給即不曾舉覺其貪冒無耻一至于此亦乞令所差官便行體量如是情實乞重行黜謫以慰遠方積年之憤貼黃稱陸師閔久擅茶事欺罔朝廷奏請如意為吏民所畏憚若留在本職雖特遣使命恐必難以體量實害欲乞先罷師閔職命及利州路轉運使蒲宗閔昔同建議榷茶曾竊

冒恩賞顯有妨礙亦乞指揮不得同簽書體量事所貴
官吏不憂後害敢以實告

舊錄但于閏二月二日略載
轍奏數語新錄因之今具載

此

甲申蔡確言已再具表辭位准朝旨令臣管勾門下省
緣臣見候解罷欲望差權官管勾詔差尚書左丞呂公
著御史中丞劉摯言臣聞書君陳曰爾有嘉謀嘉猷
則入告爾后于內爾乃順之于外曰斯謀斯猷惟我后
之德此言人臣之義有善則稱其君雖謀出于已亦必

曰吾君之德者上下相成忠厚之至也伏見宰臣蔡確
辭位求退其所上表無引咎之意有論功之言自陛下
臨御以來美政盛事民所歌誦者確皆鋪列條叙以為
已功中外傳之靡不怪笑夫收拔耆艾之臣置諸左右
乃陛下至明獨見以天下公望用之而確乃以為已之
所引罷去有司漁利剥下苛細之法而黜逐汙吏乃陛
下仁心惠德以蘇疲民而確又以為已之所請至于申
戒邊場不使生事分遣使者求民疾苦修法令以備先

朝之政包同異以行大公之道此中外皆知出于陛下
聖謀睿慮實新政之甚善者而確乃一切認之掠為已
事貪天之功欺示天下其意謂此數者陛下不能知之
因已請而知之陛下不能行之因已請而行之其于輕
慢君父欺罔臣庶違道干譽至于此凡確之所引數事
者確果曾有所建請乎蓋不可知也確在言路為執政
前後久矣不言之于先朝而言之于今日此何意也果
有建請固大臣職爾如君陳之歸美于上可也而叙于

求退之章又何意也不言之于先帝此不忠之罪也言之于今日此取容之計也叙之於表謂我有功則退陽為求去實欲陛下疑以為功而留之因欲求免于公議此持上罔下之謀也古之人有意于止退則削其藁不欲使人知善之出于已所以推遠權焰避掠美干名之議不知此則何足以為大臣乎確無禮不恭朋邪懷貳無廉耻之節昧進退之義又自去冬大旱至今確為上相身任其責其罪惡之著無補朝廷今既逼于公論不

得已而求去正當痛自咎責跼踖偃僂為懇切必退之
詞乃大臣去就之體今確夸功揚已露行行不平之氣為
臣如此不謂之大姦大邪可乎伏望以確表并臣此章
付之三省議確之惡重行竄逐以正典憲使天下為人
臣者皆得以自盡 左諫議大夫孫覺言臣竊見左僕
射蔡確右僕射韓縝兩人皆非以德進者也或以典治
獄事或以分畫邊界而至執政官臣不敢論其小節細
行以瀆天聽直以其進身本末為陛下一一言之可以

知曲折矣蔡確按濬川獄知制誥判司農寺熊本奪職
確即遷知制誥判司農按御史中丞鄧溫伯治相州獄
溫伯罷知撫州確即遷御史中丞按參知政事元絳太
學獄絳罷知潁州確即遷參知政事此三獄者士大夫
多以為冤確皆批其頰拉其背而奪之位未幾先朝更
定官制確即為右僕射所謂大臣以道事君難進而易
退者其若是乎今確在朝立百辟之上士大夫相與歎
息以其廉隅不修有甚于市人也永裕陵禮畢宜避位

以去今已五月矣而遲遲不決雖請不堅尚冀聖恩之
復留也韓縝不學無術衆論不以輔相期之先朝嘗以
北敵爭地事付之衆謂縝必辱命已而果然無故割地
其長七百餘里以遺北敵邊人怨之切骨以為奪我祖
父之地棄之敵人非獨惜其地也又歸怨于朝廷敵人
得地之後日益桀傲今縝為右僕射臣見敵使來朝問
知其官各相顧微笑意以為中國無人乃使是人為相
也益有輕中國之心每輒驕慢漢王商為相單于仰視

商貌大畏之天子聞而嘆曰此真漢相矣伏乞皇帝陛下
下太皇太后陛下以災異之故罷免確鎮別選有德有
言衆所畏伏者使稱其位外足以鎮撫四夷內足以悚
動天下以懷徠桀傲不軌之心不勝幸甚方覺又言臣
聞蔡確已遷出東位上章求去見傳報表草方更自陳
功勞頗更矜伐其詞曰請收拔當世之耆艾以陪輔王
室若如其言則是司馬光呂公著之徒今位在執政皆
其所引也蠲省有司之煩碎以安慰民心若如其言則

自皇帝陛下太皇太后陛下親政以來所以便安百姓
省減諸色誅求者皆其所陳也洪範曰惟辟作福惟辟
作威惟辟王食臣無有作福作威王食如確之言是作
福也嚴邊備以杜二國之窺覷人臣在相位不以鎮撫
四方為心則焉用彼相矣今北敵盟好八九十年非確
所能為也假令西人納款入貢如他時祖宗威靈所致
確亦何功之有走使輶以察遠方之疲瘵如張汝賢陳
次升往福建江西以陛下即位以來上書言利害者多

遣往按之非確所建也就令建之豈可自言乎明法令之美意以揚先帝之惠澤先帝惠澤在人人豈忘之不及待確而後明也厲公平之一道以合衆志之異同人心異同亦何足恤在上者以道揆之可也異者是耶不以其異而却之同者非耶不以其同而取之顧吾所設施合于道與否爾確之表幾百言其尤甚者此六句爾大抵欲自明有功無罪以言攻之者為非也尚書曰爾有嘉謀嘉猷則入告爾后于內爾乃順之于外曰斯謀斯

猷惟我后之德此大臣之任賢者之事也今確為左僕射上章求去宜曰久與政機何補毫末冬愆陽而無雪春不雨而害農引咎自陳庶幾可免今乃厚自矜伐若市道然非尚書所謂斯謀斯猷惟我后之德也臣聞禮記曰善則稱君過則稱已則民作忠今確為左僕射人臣無二矣朝廷故事有害于民不引以為已過至于改更之際乃皇帝陛下太皇太后陛下圖民疾苦有所更張確乃以為功人臣操心若此可乎確雖避位求去陛

下未賜詔可確更有遲遲欲留之心伏願早賜罷免如
韓縝非才士論所駭臺諫雖聞有所彈擊縝方偃然自
居未有引去之意伏願以臺諫臣僚所上章疏悉以示
縝并令罷去如此則確等去位不敢更懷怏怏不平之
心伏願聖慈早賜睿斷貼黃稱臣前後兩劄子乞罷免
蔡確韓縝左右僕射今蔡確雖上表乞罷遷出東位韓
縝尚偃然自居未有去意

邢恕孫繹錄其父言行云孫
莘老為諫議大夫方劉摯王

巖叟力攻蔡確時莘老獨無所言巖叟至諷之為姦人
莘老乃首與蘇子由攻彈韓縝按覺正月末已有一章

此月又有兩章則繹妄說不待辨而可知矣閏二月五日甲午覺與蘇轍同對

司馬光具表

乞罷門下侍郎又劄子言臣以羸病拜起及上下馬不得請朝假將治已及餘月旬日以來疾大勢雖退飲食亦稍進然氣體疲乏足腫生瘡步履甚難策杖而行不出室堂況于拜起固所未易臣自料度筋力全復可以朝趨近亦數月遠則半年或過此期未可前定豈有執政之臣身據高位受厚俸既不趨朝又不供職宴安偃仰養病于家何待人言獨不內愧臣是用夙宵惶愧無

地自處今不免有表上瀆聖聽乞除宮觀差遣一任以
養衰殘竊慮陛下怪其忽有此奏故別具劄子披瀝肝
膽伏望聖慈早賜開允

乙酉詔答不允仍遣入內供奉官陳衍宣諭光復言臣
自結髮從學講先王之道聞君子之風竊不自揆常望
有尊主庇民之志不意天幸蒙陛下誤采虛名擢于閭
閻之間寘之廟堂之上禮遇過優委任至重臣非木石
豈不知荷戴大恩銘心鏤骨願竭駑蹇少報萬分眷戀

天庭豈肯輕去不謂一旦嬰此沉疴累月不愈害于飲食不能造朝今雖疾勢漸平飲食亦進而皮骨羸瘠氣力疲乏足腫胛瘍餘毒方熾旬月之間必未能趨伏闕庭瞻望天光端居私家尸位竊祿縱陛下寬仁微臣不知廉恥中外有識之士及天下衆庶其謂臣何伏望聖慈矜察依臣前奏除宮觀差遣一任使得自安其分

右正言王覲奏

編類章疏二月二十六日

臣竊聞知樞密院章惇言

役法未便事臣省詳門下侍郎司馬光所陳差役法雖

大意已善緣不曾經有司立成條目內有小節未安須當接續行下庶幾良法早定不為浮議所搖臣于今月二十四日具狀聞奏訖其章惇文字臣雖未見度其中必有可施行者伏望陛下與執政臣僚熟議若惇之言果有助于役法則行之何疑要之濟務而已然司馬光從初乞行差役劄子係三省及樞密劄子施行為大臣當其時不能盡忠進說乃待其既已施行之後方有論列欲以彰司馬光之短見已之長於天下而已此豈有

赤心直道裨補聖政之意哉光之論事雖或有所短不
害為君子惇之論事雖時有所長寧免為小人大凡國
家之事須執政大臣同心協力而後可成惇之姦邪欺
罔著聞有素於此役法一事尤見其處心積慮欲以傾
光而不顧其有傷于國體有誤于陛下也陛下察惇如
此尚可以置于樞機之地以為腹心之人乎古者不以
人廢言固有不可不察者然惡亦不可以不懲伏望聖
慈詳酌特行顯黜以戒不忠

二十四日奏未見當求之
論投名衙前必非二十四

日所奏已附二十八日二十
四日亦附此當去一存一

